

Program mobiliti ke Indonesia

PERSATUAN Teater dan Drama Pentas Kumpulan 1 dengan kerjasama Pusat Kokurikulum dan Pembangunan Pelajar (PKPP), Universiti Putra Malaysia (UPM) baru-baru ini, telah mengadakan program mobiliti ke luar negara selama empat hari di Bali, Indonesia.

Pengarah program Layar Pariwisata, Aditya Utama berkata, program yang mendapat kerjasama Universiti Udayana, Denpasar, Indonesia itu bertujuan memberi pendedahan kepada siswa mengenai budaya serta keunikan Indonesia selain memperkenalkan budaya Malaysia di Indonesia.

“Program ini adalah platform untuk memperkenalkan UPM sebagai landasan kepada pembangunan dan kepimpinan anak muda pada era globalisasi ini,” katanya.

Beliau berkata, objektif program untuk memperkenalkan budaya dan tradisi Malaysia kepada Indonesia khususnya di Bali serta mengetengahkan pengetahuan dan silang budaya negara lain kepada

siswa siswi UPM.

Mahasiswa Bachelo Ekonomi, Fakulti Ekonomi dan Pengurusan UPM, Nurunnajwa Nor Aripin berkata, beliau bersyukur diberi peluang untuk mengikuti program itu.

“Pada saya, pengalaman ke negara orang sangat berharga selain dapat meningkatkan kemahiran insaniah daripada segi komunikasi serta kepimpinan dalam diri,” katanya.

Fasilitator Kumpulan 1, Ahmad Qadry Basri @ Boseri berharap, penuntut UPM dapat memanfaatkan ilmu melalui program mobiliti itu.

“Program ini telah dirancang selama setahun dan alhamdulillah berjaya dilaksanakan hasil kerjasama semua pihak terutamanya pengarah program,” katanya.

Antara aktiviti utama program ialah persembahan Tarian Saraswati oleh Universiti Udayana dan persembahan sajak daripada UPM, selain perkongsian ilmu dan pertukaran pendapat mengenai budaya oleh kedua-dua universiti.



Program beri pendedahan berkaitan budaya dua negara.